

四部叢刊續編集部

茗齋集二十三卷
附明詩鈔九卷
一

卷一至卷五

上海涵芬樓
影印海鹽張
氏涉園藏手
稿刻本寫本

彭孫貽傳

新城王士禎阮亭撰

彭孫貽字仲謀號羿仁太僕公期生次子幼穎異于書一覽輒記與兄孫求有機雲之譽公博聞才辨五試咸冠軍以是名噪一時咸禎間三吳雲間倡文社四方主壇坫者重公名數邀公執牛耳公謝勿往壬午試鎖闥分校司理雲間陳公子龍得公卷奇其才薦之主司已擬元乃以病不克竣試檄棘陳公謂鹽令劉公堯珍曰恨彭生不得出吾門吾雖不及歐陽此子實不愧子瞻也公感陳知己遂稱及門後陳公以義全而公終隱人稱公為不負所知也次年以明經首拔于兩浙當太僕公變于章江公間關兵燹徒跣號泣冒白刃以求太僕公遺骨精誠所

感遂有江右義故負骸送歸亦天所以憫公之孝思也嗣是杜
門奉母終身布衣蔬食當道有重其才勸之出者公謝弗應雖
負文名亦節義自許不妄交遊人咸服其深識又未嘗高自標
置有求其文者悉與之邑中碑銘記頌皆出其手生平憤懣悵
鬱悉寓之詩故為詩益工間有倡和會邑令奉部檄修邑乘因
聘公及童公伯旃咸辭再三勿得遂與廣搜博考精晰詳瞻書
垂成而公以疾不起臨卒無他言唯曰我所以不即從太僕死
者以母老兄疾耳今不得終奉養存沒兩負有愧我二弟遠矣
公之二弟饒孫子羽皆以死殉父難者也卒年五十有九門人
私謚為孝介先生公于書自經史百家下至氏族方技釋老稗

乘之書靡不畢究且手摘錄之為文皆有灋于詩則上自漢魏
六朝三唐宋元以迄明之何李七子無體不脩亦無不逼似小
詞樂府亦無不與秦柳並驅爭衡者抱奇不遇賡志以歿世痛
惜之適朝廷徵名儒姚江黃太沖先生纂緝明史黃不起而以
公之流冠志上之遂付史館則公之書亦見用于世矣所著有
茗齋詩文集流冠志詩餘樂府百花詩并襍著若干卷

孝介先生傳

同里徐盛全撰

孝介先生姓彭氏名孫貽字仲謀一字拜仁其先全椒人有名勝者從明太祖起兵授指揮使世襲調海寧衛因家海鹽為海鹽人數傳至河南道御史名宗孟生太僕寺卿名期生則先生之祖父也自侍御以上代襲指揮至侍御始登萬厯辛丑進士而太僕與其兄上海知縣名長宜同舉于乙卯太僕登丙辰進士第而上海則登第于崇禎癸未父子咸為名臣兄弟卒皆殉國云先生生而絕倫風發泉湧髫髻操紙筆數千言立就浩博宏麗加以鐫刻富明季爭奇挾

與時軼出其儕偶無能跂及者試于學使者五皆第一凡他試無不冠軍壬午秋闈華亭陳公子龍以紹興府推官同考薦之主司翰林院編脩吳公國華吏科給事中范公淑泰皆嘆賞定為第一以病不能終場報罷後遇時恩選士貢成均復第一自萬厯間諸君子務為講學顧端文高忠憲兩公倡為東林書院四方之士益興起雖羅奄獄得禍最酷士益以名教自奮及復社興而東南諸都邑各推其英傑以為領袖海內趨之如鶩為之聲氣海鹽曰瞻社先生與吳仲木先生蕃昌等主之號為武原二仲諸方名宿聞

先生名莫不退避三舍然先生志在千古不屑屑標
同角異日閉門著述講求有用之學當事非文藝相
賞求一面不可得甲申乙酉之變太僕以江西左布
政使分守嶺北駐贛州時南京已陷閩越各有所立
不能相協遂相繼淪陷太僕猶與太學士楊公廷麟
督師兵部侍郎萬公元吉協守贛以圖恢復城孤援
絕血戰踰年卒不守太僕與楊萬二公及文武將佐
寓公辟士同日盡節無一人自屈者而嘉興亦以倡
義拒守盡遭屠戮太僕兄上海公及子弟四五人同
日罹害先生奉其母夫人遁避得免亂甫定而贛州

之變聞降將金聲桓復反江西道路阻絕先生殮諸父兄之死于兵者安輯母夫人與族屬之得免于兵者即携兩蒼頭冒兵革入贛沿途物色遭故部曲于道始悉太僕盡節于章貢臺遺骸為故吏杜鳳林桂芳等瘞之臺上先生哀號重趼步至殯所發其瘞遺跡渺然蓋先是為部將楊大器與萬安義士曾堯臬發之已攜歸萬安矣先生上下贛江晝夜號泣卒不可跡人言藉藉太僕踰嶺從粵西所立矣先生心知太僕盡節而狐鳴魚帛所在假托禍至不測乃與故部曲謀刻木為骸招魂東返有太僕行畧湖西遺事

虔臺逸史記其事後歲遣客上贛又屬從弟少宰公
入粵過嶺踪跡之絕無影響先生素衣蔬食二十餘
年恒若苦幽不交人事每從緇流羽士吟嘯野寺荒
苑間或獨行海上浩歌激烈與潮汐相互答或獨立
書空咄咄或中夜揮杯痛哭人見而怪之當事見先
生角巾廣袂吹索百端有故人寓京師者招先生曰
曷遠遊以釋疑乎乃輕裝北上巡覽名勝憑弔陵寢
作詩數百篇未嘗謁一顯者先生已至京師則萬安
義士曾堯鼎以太僕遺骨來歸聞之晝夜兼程追執
喪禮哀毀彌至自是益閉門著述卷帙之富近古未

有年十三即能詩先輩胡職方震亨見而賞譽之朋
酒倡酌邑人傳誦晚而愈工上追騷雅下逮長短倚
聲皆窮變詣極多至百卷文集若干卷外有史論流
寇志亡臣表方士外紀國恩家乘錄彭氏舊聞錄客
舍偶聞茗齋雜記歷代詩鈔五言妙境茗齋四韻合
編及天文地理陰陽佛老稗官野乘纂輯釐整各自
成帙往往散佚于世又作書數種一夕手焚之先生
明達剛果少有經世之志大而國家治亂細至里巷
利弊無不洞若觀火處置纖悉俱盡戚黨陰蒙其庇
易簣之夕自序平生欲得一見于世而家國至斯忠

孝兩員夫何言遂冥然而化年五十九以母夫人不及終養遺命麻衣以殮卿士大夫高其節悲其志私謚曰孝介先生

徐子曰先生聲名滿天下遭變後不見一人獨與吳仲木先生及仲木弟衷仲先生謙牧李潛夫先生天植相往還人皆以鄭所南謝皋羽目之其後兩吳先生皆因難哀毀卒而李先生窮餓死皆不負所志焉吾邑多志節之士予所見先生倫輩素衣疏食終其身者十數人常欲次其事傳之頻年湖口四方今老矣恐不能遂所志故勉為先生傳以權輿之云

茗齋詩初集序

貽五六歲先大夫口授沈約四聲已能解年十三學爲文乃竊學爲詩先大夫怒之曰士君子須爲有用之學卽詩如李杜何爲者然私心不自禁先大夫方守豫章每出蒞聽事竊抽架頭詩觀之上自古詩六代三唐以及時人所裛集意以爲佳手鈔之各成帙時時學爲之終不敢示人十六而歸里伯父上海公見而喜之遂稱道於人胡職方孝轅往往索觀極爲獎借之以傳於人旣冠與四方賢達者遊益馳騫汗漫然苦無體裁多而不精裛聚舊作視之多汗泚焚之不盡聊存此以志其

始云始自丁卯終於丁丑凡得若干首

康熙丁未春暮彭孫貽羿仁氏輯舊稿紀其首

茗齋集目錄

本傳

卷一

詩 一百六十五首 天啓丁卯至崇禎丁丑 刊本

卷二

詩 六百五十二首 崇禎戊寅至順治丙戌 稿本

卷三

詩 三百二十首 順治丙戌至己丑 稿本

卷四

詩 嶺上吟三百九十三首 順治己丑 稿本

卷五

詩四百有四首順治己丑至丁酉 稿本

卷六

詩六百一十九首順治丁酉至己亥 稿本

卷七

詩四百有一首順治庚子至康熙癸卯 抄本

卷八

詩 吳山寓草一百五十三首附詩餘九首康熙甲辰 稿本

卷九

詩樂府一百五十六首康熙甲辰 稿本

卷十

詩 六百二十四首康熙甲辰至丙午 稿本

卷十一

詩 五百九十六首康熙丁未 抄本

卷十二

詩 一百三十三首附詩餘四首康熙戊申 稿本

卷十三

詩 燕山小草二百五十九首附詩餘四首康熙戊申 稿本

卷十四

詩 行機集一百八十五首康熙戊申 稿本